

晴
川
後
蟹
錄

晴川後蟹錄卷之二

仁和孫之騷

晴川字輯

賦咏

松江蟹舍賦

高似孫

鴟夷子皮既相勾踐讎閭閻殄夫差吊子胥無纖恨
於越人乃騁懷於西吾乃昂然作喟然吁曰鬼死犬
烹鴻罹于學古人所危吳其亟圖方將朝三江夕五
湖一去不回樂哉此桴蓑其遺於人間情嫋嫋於如
蘇水繞乎笠澤天包乎具區松陵五一作互潮太湖交
瀾一作瀦川納壑府波畫村城一作墟石蹠一作躡岸崖

厘別岷波程杳渺水路盤迂洞渚基布聚落星敷采
之於山則綠膩女桑黃苞橘奴收菽貢梨剝棗顙茶
取之於水則絲被紫蓴筍含青菰采菱春苾食蓮燒
蘆是皆舟子所鄉魚郎所廬葭莼兮爲域莞葦兮爲
郭鴻鷺兮爲鄰鵲鵲兮爲徒時則天澄月淨風恬靄
舒或霧氣之濛沬或烟雨之扶疎棹歌亂發漁榜疾
徐命儔嘯侶靡一不魚蔭柳邊之巢慘注隔花之簷
無兒奏輕笳婦呼飛鼠木事澌澌一發靡虛乃有鱸
殘之鯽四鰓之鱸瓊異叢毓鱗甲紛拏鯉皆會於漁
市美足給於魚租至於露老霜來日月其徂萬螯生

涼含黃腠膚其武郭索其雄睢盱其心易躁其腸實
枯勇鼓而喧集齊奔而並驅鳴夷公顧而笑曰昔者
吳之將徼民甚難虞厥有躁亂害于菑畲是固汝輩
之所騁者歟吳人趨而告者當是時也善有鮮鑒貞
有罕孚樂鳩乎毒習甘乎諛一豔方妍漂香沉珠樂
極危生淪胥以鋪是故非蟹罪也維我吳人以漁爲
娛每施勤於簞斷皆得志於江塗方洞庭兮始霜熟
萬稼兮豐腴執一穗兮朝魁目洪溟兮爭趨工緯蕭
兮承流截潄沸乎一作防連燎以乾葦檻以青筠喧
動涼葩驚飛宿鳬其多也如涿野之兵其聚也如太

原之俘蟹事卓犖八荒所無今敢藉以涼狹束之風
蒲願奉一醉獻諸大夫大夫嗒然笑曰嗟汝吳兮巨
麗樂太伯兮開初括于粵兮自裕跨蠻荆兮遠摹于
星紀兮經略控軫野兮車書至若藪澤幽靈川瀆滂
洿灌注兮天下之半鬱拂兮瀛州之居忘越矢之倏
西歎鹿臺之交蕪余方超萬物兮如虬豈一蟹兮樂
且吳人再拜進曰大夫高矣儂聞宅金湯之固者莫
崇乎德者也建竹帛之功者莫勇乎謀者也目吳越
之成敗愷君臣之嗟戲然儂者生長水國子孫澤隅
朝莫一艇暑寒一簑老魚鼈而爲命狎鷗鷺而不孤

久與世以相忘亦傷今而欲痛大夫方將謝軒冕樂
樵漁儻玄機兮相高度嘉遁兮不逾今儂有粳可炊
有酒可沽幸江山兮如待祈風月兮無辜大夫爲之
欣然曰若子者是豈以蟹爲業者歟非渭水之遺智
必山澤之修癯深樂其言藏道於愚欲去兮徘徊欲
逝兮勤渠舉酒酬酢道古哀歟與之釋縛爲之拍浮
剡甲如山壘橙如鋪一作鋪意晤忘言酒深相扶指青
天兮自誓幸來世兮知予眇煙水兮莫流迅孤舟兮
長呼蟹翁者三歎於邑四顧躊躇揖長江而如矢聆
浩歌而莫能俱其歌曰天高兮月寒天風兮水急鴻

遠兮汲汲人有墓

一作墓

兮何歎及老霜澤兮遺漁斷

有蟹兮眾有魚酒答天兮天知予子不得兮愁何如
又歌曰洞庭兮旣波松江兮未雪一舸兮自決知者
樂兮樂者哲蟹健兮魚肥風吹觴兮酒淋衣知有蟹
兮不知時若斯人兮其度幾

蟹賦

李漁

死易青袍臥披黃甲胸騰數叠叠叠皆脂旁列衆倉
倉倉是肉旣盡其瓢始及其足一折兩開勢同截竹
人但知其四雙誰能辨爲十六戈甲寧施于外示有
備以無虞城府不設於中美無腸而有膈

大蟹贊

郭璞

姑射之山實栖神人大蟹千里亦有陵鱗曠哉溟海
含怪藏珍

贊蟹

危巽齋

黃中通理美在其中暢于四肢美之至也

又

蟹生於江者黃而腥生於湖者紺而馨生於漢者蒼
而清越淮多越掠故或枵而不盈

又

圓臍膏尖臍螯秋風高圓者豪請舉手不必刀羹以

蒿尤可餐

又

海聆聆惡朝露實築筐喫以醋

寄生

季芷

蘧舍之中焉不可寄或草或木隨所卽次瑣瑣礧礧

腹蟹爲饋蚌蛤牡蠣各無猜忌蝦據螺龕咄咄怪事

蟹卦

褚稼軒

蟹亨利涉大川不利有攸往至于八月有凶彖曰蟹
解也順以兌剝而烹故解也利涉大川終无尤也至
于八月有凶其道窮也象曰蟹澤上于地君子以飲

食宴樂初六用憑河需于沙出自穴盈缶象曰需于沙宜平地也盈缶乃大得也九二蟹用牡大壯朋至斯孚一握爲笑勿恤永吉象曰朋至斯孚道大光也六三外剛內柔包荒不遐遺剝之无咎象曰剝之无咎應乎天也九四備物致用君子有蟹不速之客三人來食之終吉象曰君子有蟹志喜也食之終吉不素飽也六五月幾望利西南不利東北象曰幾望有損乘天時也不利東北察地脉也上六觀我朵頤齊咨涕洟君子吉小人否象曰觀我朵頤亦不足貴也君子吉尚賓也小人否尚口乃窮也

示蟹文

曹宗璠

尾斬蚪蚪腹式蜘蛛圓旋毀規方步滅矩流脂沃肪
有似董卓之臍睥睨怒視殊同華元之目有螯無當
於蚌持爲匡何增於蠶績

登大雷岸與妹書

鮑照

至於繁化殊育詭質怪章則有江鵝海鴨魚鮫水虎
之類豚首象鼻芒鬚針尾之族石蟹土蚌燕箕雀蛤
之儔析甲曲牙逆鱗返舌之屬

答友人約往雪上

范質

雪上號水晶宮非止謂野渡酒溪漁鄉蟹舍隱映于

浩渺間也綠波滿郭花下櫓聲而轉橋到門倚柳垂釣不減濠梁之意

與韓稚圭

范仲淹

素問奇書其精妙處三五篇恐非醫者所能言也書序云三墳言大道也此必三墳之書宜少服藥專於積氣養生之說也道書曰積氣成真是也唯節慎補氣嚙津之術可行之餘皆迂怪貪慕神仙心未灰而意已亂必無信矣兒子致疾由此也近却肯服藥有圖史蒲博琴尊以自愉悅有興則泛小舟出盤閭二門吟嘯覽古於江山之間渚茶野釀足以消憂尊鱸

地人卷之三
稻蟹足以適口又多高僧隱君子佛廟勝絕家有園
林珍花奇石曲池高臺魚鳥流連不覺日暮

與溫公書

東坡

彭城佳山水魚蟹爭訟寂然盜賊衰少聊可藏拙寓
居去江無十步風濤烟雨曉夕百變江南諸山在几
席此幸未始有也

答趙撫幹伯椿

王十朋

薦拜劄翰之辱如對標致于几席間喜可知也暑雨
未歇伏審蓮幕風高贊畫有相台候萬福某竊祿懷
媿每厘記錄蝨蟬風味不惟勝無腸公子自可以輩

瑤柱江君會稽固不易得錢塘又絕無之臨食必起
故鄉之思興與鱸葦同但不能如張翰之勇決耳遠
蒙分貺以養吾老饕餮感俱不少也道山石渠輒納
墨本置之悠然閣可與南山同入眼劉子政乃天祿
閣中人豈容懷惓惓之忠久屈于外耶

回吳守中秋送物

劉宰

五馬人生貴方仰竊於餘輝明月今宵多忽鼎來於
嘉餉富哉蠟釀美矣霜螯餅餌芬香果實羅列具形
真染皆鐵畫銀鈎敬誦好辭信金聲玉振自惟衰晚
曷稱撫綏袖漫刺而弗前愧禰衡之不敏舍正堂而

安敢尚齊相之矜原何頒名節卽貢賀牋稟謝不虔
賜察是望

辰州與田叔禾書

陳東

鄉渡蘭江知執事留滯楠溪忻然甚期一會迫雨潦
溪漲全行日少才及下雋輶車已先日背發慙灼如
何昔人重追朋故或輕千里解組紱相從僕今不能
不如古人遠矣煩暑跋涉伏惟無恙此邦故夷蠻之
都自昔遐矣西去更有崇山茂林停嵐慘靄晝日不
開洪硿深瀆懸崖崕石馬瘖不敢前鳶飛站站不能
渡慄心茲時睇夜郎之修坂感昔賢之遺歎豫陽何

心能不悲乎尚念在郎署時與君席地持蟹螯倒瓶
浮白張目大噓何期不朝夕乃今步武間不遂對晤
固信詩人所以重一日之別也

江行

錢起

吳疆連楚甸楚俗異吳鄉謾把樽中物無人啄蟹黃

憶江南舊遊

羊士諤

曲水三春弄綵毫樟亭八月又觀濤金罍幾醉烏程
酒鶴舫閑吟把蟹螯

送盧弘本浙東覲省

張祐

東望故山高秋歸值小舫懷中陸續橘江上伍員濤

好去寧雞口加餐及蟹螯知君思無倦爲我續離騷
灞上逢元處士東歸 許渾

瘦馬頻嘶灞水寒灞南高處望長安何人更結王生
韉此客虛彈貢氏冠江上蟹螯沙渺渺塢中蝸殼雪
漫漫舊交已變新知少却伴漁郎把釣竿

舟行早發廬陵郡郭寄滕郎中

楚客停橈太守知露凝丹葉自秋悲蟹螯只恐相如
渴鱸膾應防曼倩饑風卷曙雲飄角遠雨昏寒浪掛
帆遲離心更羨高齋夕巫峽花深醉玉卮

釣侶 陸龜蒙

一艇輕撐看晚濤接羅拋下漉春醪相逢更倚蒹葭
泊更唱菱歌擘蟹螯

和漁父詞 宋高宗

雲灑清江江上船一錢何得買江天摧短棹泛長川
魚蟹來傾酒舍煙

道卿學士領二浙漕賦得酒 韓琦

傾釀留佳客秋亭弭使旄奉觴歸養切行筭別魂勞
上若名鄉近長安美價高
清懷思酌水惠政憶投醪
論德堪成頌評詩更助豪
行聞趨節觀同我怨持螯
琦往年不遂龍舒之行道卿以不嘗蟹形于嘲戲

次韻答滑守梅龍圖重陽惠酒

滑醪清滿菊花卮只欠新螯左手持

今歲並邊雨欲多徧市未至

報善隣將意厚苦慚家釀帶春醅

九日水閣

池館隳摧古榭荒此筵嘉客會重陽雖慚老圃秋容淡且看寒花晚節香酒味已醇新過熟蟹黃先實不須霜年來飲興衰難強漫有高吟力尚狂

淮上

釋道潛

蘆梢向晚戰秋風浦口寒潮尚未通日出岸沙多細穴白蝦青蟹走無窮

予求守江陰未得酬昌叔憶江陰見及之作

王

安石

黃田港北水如天萬里風檣看買舡海外珠犀常入市人間魚蟹不論錢高亭笑語如昨日末路塵沙非少年強乞一官終未得祇君同病肯相憐

小酌

蘇舜欽

寒雀喧喧滿竹枝驚風浙瀝玉花飛霜柑糖蟹新醅

美醉覺人生萬事非

弘君舉食橄
有糖蟹車螯

送謝寺丞知餘姚

梅堯臣

姚江千里海汐應山井亦與江湖通秋來魚蟹不知

數日日舉案將無窮

寄題蘇子美滄浪亭

滄浪何處是洞庭相與鄰竹樹種已合魚蟹時可緝

寇君玉郎中大蟹

文同

蟹性最難圖生意在螯跪伊人得之妙郭索不能已

墨客揮犀郭索蟹行貌也

寄聖俞二十五兄

歐陽修

憶君去年來自越俯我傳車推去闕是時新秋蟹正肥恨不一醉與君別

戲書示黎教授

古郡誰云毫陋邦我來仍值歲豐穰烏啣棗實園林
熟蜂採檜花村落香世治人方安壠畝興闌吾欲反
新桑若無潁水肥魚蟹終老仙鄉作醉鄉

漁父

蘇軾

漁父飲誰家去魚蟹一時分付酒無多少醉爲期彼
此不論錢數

金門寺中

生平賀老慣乘舟騎馬風前怕打頭欲問君王乞符
竹但憂無蟹有監州

送王庭老朝散知虢州

蘇轍

風高熊正白霜落蟹初紫夜闌意未厭河斜客忘起
次韻楊褒直講攬鏡

鬢髮年來日向衰相寬不用強裁詩壯心付與東流
去霜蟹何妨左手持

答文與可以六言相示因道濟南事

野步西湖綠縟晴登北渚烟緜蒲蓮白可供腹魚蟹
何嘗要錢

久不作詩呈王適

懶將詞賦占鴉臆頻夢江湖把蟹螯筆硯生塵空度
日他年何用繼離騷

次韻趙正字蟹

趙師秀

喚爾橫行爲多足割爾兩螯如割玉
伶爾有甲不自衛評爾一身黃勝肉
吳江十月天霜寒吳人微爾不舉食
萑蒲勿訝束爾急與虎爭強能上山

戲詠江南風土

黃山谷

十月江南未得霜高林殘水下寒塘
飯香獵戶分熊白酒熟漁家擘蟹黃
橘摘金包隨驛使米舂玉粒送官倉
踏歌夜結田神社遊女多隨陌上郎

閑題

陳造

自笑冠裳裹沐猴只今江海信虛舟
斷無貝闕珠宮

夢好在黃雞紫蟹秋詩外盡爲閑日月人間分占素
公侯政須漚鷺供青眼未厭山林映白頭

糟蟹薦杯

王十朋

翹生有理何曾濁公子無腸却最佳羅饌寧同富兒
飲帶糟聊慰老饕懷

出清溪

歸舟十日阻池陽風伯相留意亦良長喙參軍初薦
熟無腸公子正輸芒齊山却向江南好秋浦尤于社
後涼明日解維苕霅去夢魂猶在水雲鄉

謝路憲送蟹

曾文清

從來歎賞內黃侯風味尊前第一流只合蹣跚付湯
鼎不須辛苦上糟丘

章倉席上

劉宰

官舍若幽居四圍山水綠中有超詣士簿書厭拘束
邂逅文字飲交契如金玉朱絃發清音紋楸理新局
一盃復一盃夜闌更秉燭木落天宇寬蟹肥酒初熟
相期壯觀游憑高重送月勿令兒曹知此味我所獨

次韻田園居

方岳

帶郭林塘儘可居秫田雖少不如歸荒煙五畝竹中
半明月一間山四圍草臥夕陽牛犢健菊留秋色蟹

螯肥園翁溪友過從慣怕有人來莫掩扉

次韻鄭總幹

底須咄咄漫書空未覺人間欠此翁黃犢自隨諸寂寞
青山亦諱話窮通人方怒及水中蟹我亦冥如天外
鴻醉眼不知人幾品久將樵牧等三公

人間

許月卿

人間瀟洒柳塘仙三遣詩來各四篇安得左螯右杯
酒與吾爛醉柳塘邊

詠蟹

陳與義

量才不數制魚額四海神交顧長康但見橫行疑是

躁不知公子實無腸

次錢穆父

孔平仲

何當開竹溪玉腕互酌獻左手持蟹螯平昔固有願

寇君玉小蟹

文同

骨甲與支節解絡尤精研手足雖爾多能使如一錢

石湖寫景

高文度

闔闔臺下越來溪處處西風颺酒旗翠壁丹梯開短
軸黃花紅葉入新詩鎔金霜蟹須高價蘸甲香醪輒
滿卮落日去程驢背穩短琴雙笈一童隨

送鄒景仁

劉克莊

衝寒何處去新戍尚來年客勸休辭幕君言已買船
霜清江有蟹葉脫木無蟬若過東林寺攜家往問禪

杭州雜和林石田

汪元量

偶出西湖上新蒲綠未齊攜來編縮項買得蟹團臍
問酒入新店喚船行舊堤亂離多殺戮水畔幾人啼

江南憶

吳激

平生把螯手遮日負垂竿浩渺渚田熟青熒漁火寒
曾看霜菊艷不放酒杯乾比老垂涎處糟臍箇箇團

銀州道中

渡霜螯賤於土重巖野菊大如錢此時最憶涪翁

語無酒令人意缺然

畫蟹

貢南湖

海浦天寒落晚潮
怒晴紅甲利雙螯
酒邊若得金盤薦
也續坡仙賦老饕

謝陳壺天惠蟹

龔璚

寒蒲縛來腸已無
枯骨裹肉肉自腴
爲君喚醒江湖夢
孤蓬細雨聲相濡
貧家不辦滿眼沽
糟牀溜溜紅真珠
起來爲立西風裏
一徑晴寒菊數株

黃盆渡次友人韻

楊公遠

到得黃盆九月天
呼童弛檐駐征鞚
迢迢江水天連

楚漠漠淮鄉稻滿田酒旆風翻疎柳外漁家網曬夕
陽邊買將郭索傾杯處對景詩成恰一篇

看潮

瞿宗吉

壚頭酒美勸人嘗紫蟹初肥綠橘香店婦也知非俗
客奚奴背上有詩囊

送靜江教授唐廷爵以老病歸雷陽

劉三五

千仞岡頭一振衣人民城郭是邪非度江溫嶠方求
進解印淵明已賦歸桂嶺風高鴻鵠去海門潮退蟹
螯肥來春倘遂還鄉願我亦溪邊理釣磯

月夜同諸友酌

汪廣洋

休撥紫檀槽且傾黃濁醪涼天兼得月我輩復持螯
彭蠡一杯大匡廬半壁高竹林蕭灑地應有醉山濤
初碓紅杭

吳門賦謝陸繼之黃柑紫蟹之貺

倪瓚

闔閭城外皆春水斜日維舟方醉眠攜手故人驚夢
裏送書飛雁落樽前黃柑開裏頻相贈紫蟹傾筐也
可憐憶爾獨居湖上宅晴窻奇石翠生烟

江舡早起

楊基

霽色耀輕霞風檣起曙鴉防寒憑酒力避淺問漁家
日出雞鳴樹波清蟹上沙此時蓬底坐極目看蘆花

送人之平江投刺李守

張羽

送君何處遊一劍古蘇州螃蟹黃花市鱸魚碧水秋
尋碑松塢寺按曲酒家樓况爾多能者膺門必見留

畫蟹

錢宰

江上蓴鱸不用思秋風吹老綠荷衣何妨夜壓黃花
酒笑擘霜螯紫蟹肥

蟹

徐子熙

瀚海潮生萬派渾魚蝦隨勢盡驚奔雄戈老甲膛雙

眼獨立秋風捍禹門

九日子畏北莊小集

文徵明

野蔓藤梢竹束籬城闌曲處有茅茨主人蕭散同元
亮勝日登臨繼牧之踏雨不嫌莎徑滑撫時終恨菊
花遲欲酬良會須沉醉况有霜螯送酒卮

麻姑一尊餉以可

年來踪跡滯江鄉會合差池意渺茫故遣麻姑供一
笑不教元亮負重陽新杭已薦長腰白落蟹還聞塞
殼黃欲賦秋光題不得夢魂先到故人傍

寒夜以可餉蟹燈下小酌有感

戶外新霜入敝裘燈前小酌破牢愁莫言貧士無高
致只對山妻勝俗流草榻地爐寒有味卷書樽酒醉
還休元龍欲發題詩典故遣尖團到案頭

徐汧卽事

李夢陽

桃花潭前雪弄姿楊柳灘頭柳不遲着心蝦蟆章江
出章江只解產鷓鴣

題畫

唐寅

雪滿梁園飛鳥稀煖煖楸枰柴扉地爐溫却松花
酒剛是溪頭拾蟹歸

海上雜咏

湯顯祖

月晦來書蟹脂膏脫滿筐紺花浮凝點犀箸走流香

斫蟹

吳寬

斫鱠曾有人斫蟹始自予蟹也我所欲所欲寧舍魚
南人無不食水族到螳蜋風味覺斯下至美當輸渠
今歲美且賤不待霜降初鼎烹本何罪連收同族誅
我老齒將落兩螯奈偏腴手持但垂涎頗亦晉人如
薑醯既登案聊間以嘉蔬一斫即可斷大嚼已無餘
所恨性不飲右手猶自虛晉人定相笑醒然一何愚
口腹爲小體養之愧軻書惟應知味者或取斯言歟
上巳日吳野人烹蟹及吳化父兄弟宴集

王叔承

前谿雨足谿水新夜漲桃花三尺春三月三日日初
麗浮玉流觴驕醉人偶過楊柳橋西宅魚罾蟹簍當
門立舡頭活蟹紫堪擊重欲滿斤濶逾尺主人藏蟹
真得宜急流之下青籠垂日飼稻子數百穗楓落直
過桃花時蜀椒吳鹽落碓細寶刀香膩春葱絲雄者
白肪白於玉團臍剖出黃金脂主人有蟹不賣錢但
逢佳客留斟酌持螯豈慕尚方珍長對杜康呼郭索
雨後雜興

野水平谿橋波翻蓼花亂斫竹編青籃門前開蟹簍

鹽蟹數枚寄段攝中誼齋

宋訥

無腸公子舊知名風味非糟亦自清
祗信海霜肥郭索須勞野火照橫行
兩螯白雪堆盤重一殼黃金上箸輕
公退避寒應買酒獻芹毋笑野人誠

蟹

湯賓尹

蟹至秋冬之交丹膏流溢薦酒味佳
譬之詞家蓋楚騷之體也

散髮青天下雙螯手自持金膏丹鼎溢
玉骨海風吹只合娛南客寧忘寄島夷
一壺清醕罷爲誦楚騷詩

有客

孫一元

草堂對湖水地僻有高情
雨意開林色秋光泛菊英

到舡覓魚蟹有客過柴荆長日看山處相留几簞清

螃蟹磧

朱爾邁

已酉瀘陽發舟從金子山東下經擦耳手爬
兩崖過此曰馬鬣磧曰藿木岩曰新磯子忽
見江心盤石之上群蟹怒搏戛戛然與江流
爭勢榜人曰此螃蟹磧也

朝行清酒灘暮下螃蟹磧暮暮復朝朝風波永相隔
我欲持螯把酒一問之其如水枯石爛不得充几席
食蟹懷晚邨

吳之振

色畏初筵豈老饕狂歌痛飲儘麤豪湖頭郭索盈筐

買恨不同兄把蟹螯

湖中蟹殊賤十錢可得數十

買得斗酒復獲巨螯急邀鄰舟燒燭共酌

平原督郵昨日到便喚無腸公子來擘臍旋露白玉
碎剖筐忽見黃金堆小戶拚作長虹飲深杯安用急
雨催離騷痛讀綠底事吳儂那得楚些哀

楚中家報

李漁

自別金陵蟹囊空市味疎長齋幾繡佛纔食武昌魚
謝蟹歌爲歸安令君何紫雯作

客邸晴明猶苦寂那堪簷溜終宵滴曉來風雨更猖
狂倒傾峽水將詞敵無酒無錢避蟹螯街頭遇見無

顏色一年能有幾番持等得錢來君已蟄正在捫胸
歎息時神明邑宰能先知堂高不隔閭閻苦簾遠如
聞客舍咨皂隸門前呼得得廩人氣喘庖人默齋來
粟肉兩盈肩到門各自圖休息更有一人曲兩肘左
挾無腸右攜酒胥吏曾經讀晉書持來妙合前人手
盡言使君憐爾窮囊空無物壯詞峰斗酒雙螯供晚
醉豚肩菰米備朝饗我借使平啣命口代說歡欣意
難剖惟將韻事付長歌汗竹與君圖不朽人去呼童
滌釜塵蒸豚煮蟹開芳罇豪飲酣歌還大嚼貧兒今
日忽辭貧我才媿相如謬食臨邛食德慙閔仲叔猪

肝累安邑只因當地主人賢至使遊手隋農忘稼穡
宿遷岸見捕蟹者

張綱孫

下相城邊已夕暉高灘風起浪花飛土人結網橫流
處八月黃河紫蟹肥

蟹仙

晴川

異識資諧云蟹黃中有小骨如猴俗呼蟹和
尚兒子擘酒蟹說一僧兀坐胡床余觀之果
相似近有上人作詩稱爲蟹殼仙者豈佛法
本出老莊禪家有觀白骨法卽莊子化臂求
鶚炙之說今蟹肉剔去但留白骨和尚靜坐

此中澄慮存想自身要見浸漸假借化此身
爲異物則神與形離自然解脫矣因戲作偈
語

暫現獼猴相兀坐叅狐禪魔劫流三度惑惱憂四纏
六牕未曾息屏山詩六牕要自息獼猴九想欲生天以茲酒海岸
漠漠起愁煙仰願慧刃揮割此沉湎淵徃乘菩薩車
卽坐如來蓮清淨萬邪滅無爲大道全一心之謂道
何必求神仙

醉蟹

自幼飫稻粱失脚墮酒池公子無他腸醉死尚不知

歎蟹

無腸爭似蝦蟆腹

蝦蟆亦無腸

畏露還同被凍蠅

媛妹由筆蟹畏

霧露死

不向斯民存直道
仄行江上入魚罾

譏蟹

墓能呼子曰

孔堂蝦蟆解讀書呼子曰

蟹不解詩云有意效相如

成都去賣文

雜言

水蟹誇黃甲
山禽喚白頭
貴者有時賤
老死營糟丘
我觀北邙路
塚壘日悠悠
所以君子心
勿作壤蟲謀
願言期百世
聳身汗漫遊

沙上蟹

市道無知已往來多俗情不見沙上蟹群行似友生
有時執一穗怒目揮兩兵只爲稻梁謀莫顧弟與兄
蘆中虎

今夕杯酒歡明日路傍土膠漆豈不堅怕遇蘆中虎
賣蟹口號

深溪漁父設簞大小蟹俱網羅不管螭蚌蚶蛸只憑
錢少錢多

蟹詞 陸次雲

半藏半露窄穴容身穿淺渡如寂如喧吹沫成珠個

個圓 不齊不正遙睇青空雙眼硬時疾時徐郭索
橫行何所須

摘句

人厭魚蟹五穀胥熟

昌黎南海
神廟碑

水漉雜鱸蝟

征蜀
聯句

炊粳蟹螯熟下筋鱸魚鮮

李頎

籬落罅間寒蟹出莓苔石上晚蛩行

賈島

鄰雞喧暮柵寒蟹上燈窻

馬臻

似魚甘去乙比蟹未成匡

韋莊

盈盤紫蟹千卮酒

羅隱

直至葭莢少敢言魚蟹肥

陸龜蒙

橙蟹肥時霜滿天

盧祖皋

家釀難禁蟹江鱸正得蓴

韓琦

酌以瘦藤之紋樽薦以石盤之霜螯

東坡中山松醪賦

紫蟹鱸魚賤如土得錢相付何曾數

紫蟹應已肥白酒誰能勸

秋蠅已無聲霜蟹初有味

空煩左手持新蟹漫遶東籬嗅落英

詩成自一笑故疾逢蝦蟹

團臍紫蟹脂填腹

悲同秋照蟹

注餘杭風俗寒食雨後家家持燭尋蟹

海螯江柱初脫泉

白魚紫蟹早霜前

蘇轍

紫蟹三寸筐白鳧五尺童

吳中臘月百事便蟹煮黃金鱸膾雪

飲食隨魚蟹封疆入斗牛

江邊魚蟹爲人肥

奉親魚蟹兼臨海

無限黃花簇短籬濁醪霜蟹正堪持

梅堯臣有諭鷗釣蟹詩

陸珍熊掌爛海味蟹螯醢

野橘霜前熟江螯露下肥

篙師知蟹窟取以助清樽

淮南到時何所逢秋葉蕭蕭蟹應老

姚江遺魚蟹稽山奉筍蕨

前日揚州去酒熟美蟹螯

千蹠恣食雞二螯時把蟹

蘇子美

淮湖江海上慣食蝦蟹蛤

王安石

蕭寺吟雙竹秋醪薦二螯

山谷題養浩堂書

松風轉蟹眼

供盤春筍楊妃指薦酒江螯西子唇

西子唇蟹螯也

爲我辦酒肴羅列蛤與蜊

歐陽修

對酒把新蟹

霜蟹得橙同臭味梅花與菊作交承

戴石屏

芙蓉媚日紅相對螃蟹着霜黃在中

沙上雁初到樽前蟹可持

稍倦持螯手猶殘藍尾觴

宋景文

不羨嵇叔夜左右持酒蟹

張九成

常思老伊潁紫蟹羞吳杭

晁補之

蟹黃經雨潤野鳥從風奔

秦觀田居

魚蟹常隨舴艋歸

文同

溪中魚蟹易尋覓

爲問好彈處誰來聽蟹行

東閣何當呼侍兒蟹螯不妨左手持

劉子翬

酒潑葡萄螯斫雪定知此願不吾違

王梅溪

蟹黃喚止酒雞白勸加飧

唐庚

蟹螯常新左手執雞頭未老揆玉粒

少日詩人鱠鯨興莫年醉客持螯手

陳造

蟹螯置把虵臥影

蟹肥與客爭先把稻熟催兒徹晚收

芼鱸蠡蟹代新蒟

陳傳良澤名蟹蠡去其
匡熟壽之令如蠡也

稻蟹三吳正得秋

劉宰

小蟹有益友勁氣摩穹蒼

又通明伯量書云
小蟹莊北來如何

團臍霜蟹四鰓鱸

陸游

吳蟹秦酥不容說

小聚鷗沙北橫林蟹舍東

讀書時亦掛牛角對酒正須持蟹螯

喜看縷膾映盤箸恨欠斫蟹加橙椒

此身幸已免虎口有手但能持蟹螯

白魚如玉紫蟹肥秋風欲老蘆花飛

方岳

藥自不能專忌蟹酒吾甚愛未浮蛆

舴艋舟行容釣蟹

霜螯玉樹姚江上作意三年醉月華

曾茶山

蟹眼已沒魚眼浮

白玉蟾蔡襄茶錄謂之蟹眼者過熟湯也

霜蟹香棖副所思

萬頃湖光綠正是蟹香橙熟

江頭風景日堪醉酒美蟹肥橙橘香

山民詩

橙蟹醉斟知己重葦蘆鄉話益人多

朱雪巖

來隨白舫三秋雨散入青樓一夕燈

詩林

撲紙春蟲亂爬沙夜蟹行

張憲

我欲讀爾雅不辨螯蟹名

郭邦彥

東海青童仙踞龜啖蟹螯

陳孚

銜杯憶霜蟹沙尾莫停舟

富陽縣秋
日高翥

燹僮供紫蟹庖吏進黃麕

張翥

只憐郭璞註蟲魚或誤蔡謨啖蜺蠹

吳澄

着句愁詩俗持螯喜蟹肥

楊公遠

持螯把酒一生足食蛤踞龜干刼非

同倪雲林王伯
純飲散過大姚

江楊
維禎

水母或潮捲蟾蚌乃泥蟠

吳萊

潛游蟹斷島無人飽啖蝦鬚汊作國

呂梁懸水無盤渦况肯遽數蟹與羸

稻蟹紛難數

挿竹侵沙魚扈短篝燈映草蟹碕空

公往知我誰翻然採蠦蠹

至杭聞吳汲仲先生沒

水族紛異嗜魚蟹及蠦蠹

巨螯擎擁劍香飯漉雕胡

劉基

新蟹斫金腴甘釀拍瓊液

宋濂

晨淚鵬鴻多秋腥鱸蟹贍

高啓

稻蟹燈前聚莎蟲機下喧

稻熟湖蟹賤

過湖就稻蟹靜處容不肖

烟生遠塢聞雞唱湖落平沙見蟹行

紫蟹凝霜香橙噴霧

楊基

漱芳雉腴再三讀項上之臠左手蟹

舟入蔡河懷徐幼文

黃柑來野市紫蟹出溪潯

徐賁

曉市多魚蟹村庄足稻梁

方尚履題沐陽

江湖魚蟹總蜉蝣

王鏊

鼎謝繆公仍餽肉蟹憐畢卓獨持螯

葦梢縛蟹雙螯亂

徐渭

紫蟹壯可持濁醪美堪掇

李于鱗

歸家得向錢郎醉分取吳江蟹半黃

湯顯祖

水舍通魚鳥山田占蟹螺

見說臨川港江珧海月佳

蕉葉共聽窻下雨蟹螯分弄手中杯

唐寅

白髮持螯能幾醉黃花在眼卽重陽

文徵明

紫擘輪芒蟹黃烹啄黍雞

堆盤蝦蟹輸村樂匝屋雞豚驗歲登

野田初下披綿雀隣籩能供啄雪螯

金橙螃蟹銀甕葡萄

馬浩蘭
花影集

香橙螃蟹月新酒菊花天

流奎律
隨注

寄居之蟲委甲步內抱朴子

一鼎已煎紅蟹眼韻府群玉

擁劍八帶甲魛青鱗余光北京賦

江山之勝稻蟹之美蘇舜欽答范資政書

稻蟹不遺王義豐館娃賦

頭會箕歛杼軸其空災異相仍稻蟹不熟盧思道為隋檄陳文

蠶蟹鄙諺狸首淫哇苟可箴戒載于禮典文心雕龍

霧滂而蟹螯枯露下而蚊喙折升菴外集

霸州邊塘灤霜蟹當時不論錢春渚紀聞

黃擘團臍蟹霜批巨口鮎吳偉業

地冷有霜飛入月客貧無蟹度重陽

李漁

鯨鵬之大蝦蟹之細

昌黎鯉魚文

蟣蟣高士蜺子禪師

傭吹錄

無身之頭無首之體蟹無首海和尚無身

抱朴子

鰈分體而合食螭奴璫蛞異象而合食知此而何彼

何我

筆洞子

襄里百哥蒙古蟹也白八蟹足黃大蟹殼

事物紺珠

輸芒蟹曰藥蟹

沙狗一名沙裏勾

石蚬小蟹石螯蚌小而黃肉硬

蠃螭蟹鬼面蟹

內黃舍人執銳郎

西施古生閩廣沙灣中有小蟹本名車蛤以美故稱

全

王珣海月三螻蝦江

江賦

海水之陽一蟹盈車

周書註

烏賊擁劍龜鼃鯖鰐

吳都賦

吳人呼螯蚌曰黃甲永嘉人呼螯蟻曰青哥

躬禹迹兮窺踐宮民如蟹兮誰能聰

浙水府

笑我平生持螯手未應咄咄左書空

孫覲

晴川後集錄卷之二終

晴川後蟹錄卷之三

仁和孫之騄

食憲

巨源食譜

金銀夾花平截

剔蟹細碎卷

冷蟾兒羹

冷蛤蜊

鄭樵食鑑

鄭樵食鑑四卷物有形質變異者如獸有岐尾蟹有獨螯羊一角雞四距之類是也有犯日辰所禁者如六甲日不食鱗甲之物丙午壬子日不食諸五臟父母及自身本命日不食本命所屬肉是也有犯時月

之忌者如螃蟹八月已前脯修四月以後麀鹿麋肉
四月至七月皆不可食是也

物類相感志

井水蟹黃沙淋而清柿煮蟹不紅煮蟹用蜜塗之候
乾煮之則青糟酒醬蟹入香白芷則黃不散喫蟹了
以蟹鬚洗手則不腥蟹與蝥蟬被蚊子叮了卽死

夜糟

稅瑛云蟹以夜糟則不沙

蜜釀蝥蟬

雲林遺事蝥蟬鹽水畧煮才色變便撈起劈開留全

殼螯脚出肉股剝作小塊先將上件排在殼內以蜜少許入雞彈內攪勻澆遍次以膏腴鋪雞彈上蒸之雞彈才乾凝便啖不可蒸過橙蘠醋供

煮蟹法

用生薑紫蘇橘皮鹽同煮才大沸透便翻再一大沸透便啖凡煮蟹旋煮旋啖則佳以一人爲率祇可煮二隻啖已再煮擣橙蘠醋供 全上

炒彭越

杭城二月街市叫賣醃彭越或有賣活彭越者人家買歸用油醬炒食曰醬炒彭越可以下酒

勿食蟹鬚

吾鄉食蟹去鬚勿食以其性太涼食之腹痛吳下以鬚爲美名曰玉蓑衣言其鬆脆而美也

飲食好尚

酌中志八月宮中造新酒蟹始肥凡宮人喫蟹活洗淨用蒲包蒸熟五六成群攢坐共食先揭蟹臍細細用指甲挑剔蘸醋蒜以佐酒或剔蟹胸骨八路完整如蝴蝶式者以示巧焉食畢飲蘇葉湯卽用蘇葉等件洗手爲盛會

誇食品

堅瓠集吳中一富翁自誇食品之妙人卽以其言作詩嘲之有云剃光黃蟹常吞蛋渴極團魚時飲醕蓋言雄蟹剃去螯毛以甜酒調蛋灌之則蟹黃滿腹凝結如膏置鰲魚於溫湯中渴極伸頭則以葱椒酒漿飲之味尤奇美

蟹生

高濂脯胙品用生蟹剝碎以麻油先熬熟冷并草果茴香砂仁花椒末水薑胡椒俱爲末再加葱鹽醋共十味入蟹內拌勻卽時可食

食蟹三昧

李笠翁曰食蟹只合全其故體蒸而熟之貯以冰盤列几上旋剝旋食爲得食蟹三昧若和以他味使蟹之色蟹之香與蟹之真味全失

製蟹

月令廣義凡鮮蟹烹食以尖臍者佳凡酒醬及糟只用團臍者切忌攪入尖臍恐易沙壞淮上糟蟹每以三十爲率要團臍者以臘糟一斤半鹽八兩醱醋半斤椒礬末量用仍以臘黃酒一斤半拌勻如法封藏可至來年夏月其味最美

糟蟹

李漁閒情偶寄甕中取醉蟹最忌用燈但初醉之時
點燈一盞照之入甕則與燈光相習任憑照取永無
變沙之患

居家必用已集糟蟹歌括云三十團臍不用尖

水洗控乾

布拭糟鹽十二五斤鮮

糟五斤鹽十二斤

好醋半斤并半酒

拌勻糟內

可殮七日到明年

七日熟留明年

晒蟹

白子蟹出寧波鎮海滿殼皆子而無肉子卽其肉也
土人取生蟹晒乾以饋客名曰乾蟹子臨食用麻油
好醋澆之鮮鹽有佳味但藏久則味變不中食

油沸蟹

杭人有蟹羹鎮江有蟹麵皆取蟹黃爲之諸暨則有油沸蟹用生蟹劈開亟以椒末葱絲和麵裹之以油沸之入鹽花少許微酒畧烹一沸熟麵黃爲度其味甚美此蟹出五六月間諸暨天花落稻熟時蟹羣出食稻肥美獨早於他處若杭州沙上六月亦有蟹然大者殼空而瘦不中食且惡其不時其小者時有人用此法製食謂之曰拖麵煎蟹

酒蟹

酒蟹於九月間揀肥壯者十斤用炒鹽一斤四兩好

明白礬末一兩伍錢先將蟹洗淨用稀篾籃封貯懸之當風半日或一日以蟹乾爲度好醅酒五斤拌和鹽礬令蟹入酒內良久取出每蟹一隻花椒一顆幹開臍納入磁罇實捺收貯更用花椒糝其上了包瓶紙花上用韶粉一粒如小豆大箬扎泥固取時不許見燈或用好酒破開臘糟拌鹽礬亦得糟用五斤

醬醋蟹

醬醋蟹團臍大者麻皮扎定于溫煖鍋內令吐出泛沫了每斤用鹽七錢半醋半斤酒半升香油二兩葱白五握炒作熟葱油榆仁醬半兩麪醬半兩茴香椒

末薑絲橘絲各一錢與酒醋同拌勻將蟹排在淨器內傾入酒醋浸之半月可食底下安皂角一寸許

法蟹

法蟹團臍大者十枚洗淨控乾經宿用鹽二兩半麥黃末二兩麴末一兩半仰疊蟹在瓶中以好酒二升物料傾入蟹半月熟用白芷末二錢其黃易結

醬蟹

醬蟹團臍百枚洗淨控乾逐箇臍內滿填鹽用線縛定仰疊入磁器中法醬二斤研渾椒一兩好酒一斗拌醬椒勻澆浸令過蟹一指酒少再添密封泥固冬

二十日可食

橙蟹

山家清供橙大者絕頂去穰留少液以蟹膏入其內
仍以頂覆之用酒醋鹽水蒸熟既香而鮮使人有新
酒菊花香橙螃蟹之興

論食水族

晴川子曰西洋教以水族肉爲素食夫等肉也水陸
何分聞虎能食人矣人還有時而食虎弱之肉強之
食相陵也而後相食龍則無人能陵之故人罕得食
龍肉至於魚也鰲也螺蚌蝦蟹也其細已甚人從而

陵之則群從而食之於呼彼肉與此肉亂離荒札之
歲人且相食耳食人肉與食自己肉何以異則陸生
肉與水族肉又何以異哉是以庖廚不邇五羆是翼
殷后改祝孔鈞不綱所以明仁道也

人與物同

淮海秦氏勸善錄生蟹投糟欲其味入鰓魚造膾欲
有經紋聚炭燒蚌環火逼羊開腹取胎刺喉瀝血作
計烹煎巧意闢釘食之既飽則揚揚自得少不如意
則怒罵庖者染習成俗見聞久慣以爲飲食合當如
此而不以爲怪不知貪生畏死人與物同愛戀親屬

人與物同當殺戮痛苦人與物同深思痛念良可驚懼

南北異食

拙菴雜組東南之人食水產西北之人食陸產食水產者驚蛤螺蚌以爲珍味食陸產者狐兔鼠雀以爲美品如吳人食土蚨蝦蟹鰕鱖之類不以爲怪與嶺南食螻蛄蜻蜓及鼠者何異此以五十步笑百步也

海味名

枝山野記嘗得公牒列海味名漫筆之曰魴魚鯪魚鯊魚黃魴魚鯮魚鯨猴馬鮫鱒魚鱗魚魷魚鮓魚

鯨魚鰐魚魷魚虎頭蛇燕子冠子沙鰻魚鱈頭魚鱒
魚鯢鯢魷頭魚魴魚海鯽魚紹洋箭頭魚獅子魚波
鰲鮓平沙錦裙欄翠頭沙鱖魚蠻子魚鰾魚鮮魚紅
娘子鮓魴魚草鞵底鰵鮓子蟾蜍蠍蟹蝗蟹蟛蜞鬼
面蟹竹蛭毛蛭沙筍蜩蛄蛤蛤蜊土鉄强蝦鷹爪蝦
水精蝦蠅白蝦紅芒蝦蝶肚蝦蟳蝦之子烏賊卽明
脯乾
蠃蚶子蚪冠子沙蚌魷面水母蛭蠍蚶魚鮓魚蠃羅
香蛭羅蠃蟛蟹蜆蛭子白海鱧花蠃蜡淡菜魷鬼

忌食

李石續博物志蟹鬪精上有孔其中有子有泥食之

殺人

本草蟹極動風有風疾者不可食妊婦食之令子橫生

蟹腹中有骨者不可食

四時宜忌自霜降方可食蟹蓋中膏內有腦骨當去勿食有毒

仲冬勿食

攝生月令是月也勿食螺蚌蟹鱉等物損人志氣長尸蟲勿食經夏黍米中脯腊食之成水癖疾

良方序

沈括

藥之單用爲易知複用爲難知世之處方者以一藥爲不足又以衆藥益之殊不知藥之有相使者有相反者有相合而性易者方書雖有使佐畏惡之性而古人所未言人情所不測者庸可盡哉如酒之於人飲之踰石而不亂者有濡咳則顛眩者漆之於人有終日搏瀉而無害者有觸之則瘡爛者焉知他藥之於人無似之者此亶賦之異也南人食猪魚以生北人食猪魚以病此風氣之異也水銀得硫黃而赤如丹得礬石而白如雪人之欲酸者無過於醋矣以醋爲未足又益之以棧二酸相濟宜甚酸而反甘巴豆

善利也以巴豆之利爲未足而又益之以大黃則其利反折蟹與柿嘗食之而無害也二物相遇不旋踵而嘔此色爲易見味爲易知嘔利爲大變故人人知之至於相合而之他藏致他疾者庸可易知耶如乳石之忌參朮觸者多死至于五石散則皆用參朮此古人處方之妙而世人或未諭也

方

濕熱黃疸蟹燒存性研末酒餉丸如桐子大每服五十丸白湯下日服二次

陳藏器續斷絕筋骨去殼同黃搗爛微炒納入瘡中

卽連也

唐璠經驗方骨節離脫生蟹搗爛以熱酒傾入連飲數椀其楂塗之半日內骨內谷谷有聲卽好乾蟹燒灰酒服亦好

董柄驗方中鰓魚毒食蟹卽解

日華子產後肚痛血不下者以酒食之

蟹螯

寇宗奭小兒解顱不合以蟹螯用白及末搗塗以合爲度

蟹爪

本草經疏蟹爪性迅利主破胞墮胎

千金神造湯治子死腹中并雙胎一死一生服之令死者出生者安神驗方也用蟹爪一升甘草二尺東流水一斗以葦薪煮至二升濾出滓入真阿膠三兩令烊頓服或分二服若人困不能服者灌入卽活下胎蟹爪散治妊婦有病欲去胎用蟹爪二合桂心瞿麥各一兩牛膝二兩爲末空心溫酒各一錢

孕婦藥忌歌藿麥藺茹蟹爪甲

胡洽方治孕婦僵仆胎上捨心有蟹爪湯

蟹殼

九月九日收藏蟹殼治產後兒枕痛

崩中腹痛毛蟹殼燒存性米飲服一錢蜂蠆螫傷蟹殼燒存性研末蜜調塗之熏辟壁虱蟹殼燒烟熏之

蟹汁

鹽蟹汁主治喉瘋腫痛滿含細嚥卽消

黑鬚方用活蟹一隻啄蟹殼以生漆灌入取汁染鬚久不變色

夷堅志襄陽一盜被生漆塗兩目發配不能覩物有村叟令尋石蟹搗碎濾汁點之則漆隨汁出而瘡愈也用之果明如初

搗汁滴耳聾又治瘡

蟹毒

康熙甲午科餘杭舉人姚堅字克柔性嗜蟹時九月初在親族家席上啖蟹十餘枚一時頓覺昏悶卽延醫療治蟹已不知其病所由來投以人參諸藥不能治及榜發報者至家則克柔死矣世說蟹未被霜甚有毒云食水茭所致人中之不療多死今九月霜後輸芒正可食時胡致毒死或云克柔吃蟹又吃方頂柿故爾按本草蟹不可同柿及荊芥食發霍亂動風木香汁可解又解蟹毒不獨大黃紫蘇冬瓜汁凡蒜

汁豉汁蘆根汁黑豆汁生藕汁皆可解之乃醫者不
讀方書動以人參誤人真屬可恨此事余聞之餘杭
吳君世衡

蟹性

李時珍曰諸蟹性皆冷亦無甚毒爲蟬最良鮮蟹和
以薑醋侑以醇酒咀黃持螯畧賞風味何毒之有饕
嗜者乃頓食十許枚兼以葷羶雜進飲食自倍腸胃
乃傷腹痛吐利亦所必致而歸咎于蟹蟹亦何咎哉
經疏云蟹外骨內肉陰包陽也入足陽明足厥陰經
經曰熱淫于內治以鹹寒故主胸中邪氣熱結痛也

啁僻者厥陰風熱也面腫者陽明熱壅也解二經之熱則筋得養而氣自益啁僻面腫俱除矣鹹走血而軟堅故能解結散血

簡誤云蟹性冷能散血熱爲病故跌撲損傷血熱瘀滯者宜之若血因寒凝結與夫脾胃寒滑腹痛喜熱惡寒之人咸不宜食

蝥蟬

解熱毒治小兒痞氣煮食

蠍蟹

本草蒙筌殼濶多黃兩螯最銳行大人風氣亦宜

蟛蜞

食多吐利損人取膏塗濕癬疽瘡石蟹搗傳久疽瘡
無不瘥者

蟛蜞

膏塗濕癬殺毒不宜食之

擁劍

大螯待鬪常伸小螯俱食每縮亦有毒不宜食

晴川後蟹錄卷之三

終

晴川後蟹錄卷之四

仁和孫之騷

一字輯
晴川

拾遺

時媚鬼

治時媚鬼者須善識十二時三十六時獸如子有三
貓鼠伏翼丑有三牛蟹鼈知時喚名媚卽去也

摩訶
上觀

無長叟傳

無長叟其先占籍解梁以郡爲氏有名丹書改其姓
虺氏因亡澤國子孫散處汙耶之鄉或曰有餘以不
足名長以短而形子風韻丰美無所短何長之足言

故以無長目之叟始生也母卜之得坤之剝卜者曰是蓋全於地而剛外黃中而剝膚捐軀以徇人其墨者之徒歟爲人郭索嬖珊健武好勇介而戈若可畏然人得近之無患也性喜霜而惡霧不隨俗爲生常假穴以居如上古時越子方懷報吳佯下之日進種蠡問計策意殊不醕叟因饗人進見王薪臥膽茹累然也因問王曰王富貴玉食無欲矣而臞瘁乃爾非以吳怨未報耶今所吝非蠡則種二子外無得也豈捨是絕無可使者二子身則越而遙計吳能使越治而不能使吳不彊臣之族大半居吳願爲內間潛耗

其國待其民貧食艱王起而乘之庶有功王曰善旣
吳稻告成叟之族一昔戕之剪焉無存者吳人以爲
病越子乘之吳大敗後果滅吳叟之力居多越子旣
并吳甚重叟叟亦不以功自多國中自王而下小夫
庶賤凡生齒之類咸供其求有味其風度而饜飫其
道交口稱之曰自叟之來吾食必飽飲必醉叟固無
不可蕭然傾坐正復藉糟含飴時爾尤得幸於主雖
尚食或觴賜羣臣若內與后妃燕未始不侍左右近
倖尚醫之徒勸王疏之未能也思有以傾其愛乃進
東海薄氏虞句章江氏瑤石氏首王接之果大愛幸

叟爲性躁擾不能無望一日揖三子曰當越尚弱吳主盟中夏舉宗爲死間衡行莫禦使吳民無秋而越終以伯在子乎在我乎三子曰唯子不觀天道乎四時迭更功成者退掉臂赴市者匪莫而朝是不留盼也何也盛必有衰顯必有晦使子策勲之後悠然長往隨波江湖蹈滄海而深潛五鼎厚味不足以挽子身名俱全不其賢哉且夫三犧五牲牽以適廟被以綺繡薦以雕俎孰若徜徉於曠莽之野今子貪附一寸之明而不思砧杵之可畏怙虎怒之氣而忘烏喙之不可保也亦愚矣種留而誅蠡去而壽近事之驗

也子其何擇叟於是口呿沫湧不復措辭然終不能
去而死今其子孫必以秋冬爲出處之候三子恭之
亦懲其祖之失云贊曰吳起自伐其功屈於田文蔡
澤開應侯之口而代之相位蓋長於此者或短於彼
晉進退盛衰之機者曉之以理未有不幡然悔也叟
之於三子始焉憤如俄焉昭如抑亦物情然爾聞之
長老有乞郡江淮間者首問監郡無有又聞叟之所
居也欣然戒塗其籍甚衆口如此而竟不得保其天
年昔人甘五鼎烹豈叟之謂歟

朱陳造

石蛆臆

諸山記載行酒命食或云茝音軟卽水苔也或云緇音卽荇也或云石蚶音卽小蟹也或云沙江鮓卽鰕也或云何祗脯卽乾魚也諸名亦異錄之諸山記載曾慥類說中不著作者姓名

方棺蟹

遂見往寧郡拾一小蟹歸背方狹隆然如棺形土人名曰方棺蟹一螯偏大類擁劍卽止觀輔行云舉螯等者蟹類也

中郎思溪女留

袁中郎詩云箸闌思蟹足陸游新秋詩溪女留新蟹

園公餉晚瓜

糟蟹餛子

軒渠錄載有人以糟蟹餛子同薦酒者或笑曰是則
家中沒物事然此二味作一處怎生喫衆以爲笑近
傳潏浦富家楊氏嘗宴客作蟛蠃餛飩真可作對也
又余侍先子觀潮見道人負一簾枯蟹多至百餘種
如惠文冠如皮弁如箕如瓢如虎如龜如螳如蝟或
赤或黑或紺或斑如玳瑁或粲如茜錦其上有金銀
絲者皆平日目所未覩

癸辛
雜識

糖蟹皆糟

夢溪筆談云南人嗜鹹北人嗜甘魚蟹加糖蜜蓋便
於北俗也又老學庵筆記唐以前書傳凡言及糖者
皆糟耳如糖蟹糖薑皆是

入虎

畫墁錄本草著八月後獬與虎鬪而虎敗骨入虎以
此而死非力不贍知有所寤也

醫鹿

主制羣徵鹿被射旋覓藥艸以出其箭中毒則食蟹
以解之是蟹能醫鹿也晴川子曰拙哉蟹能醫人不
能以自醫

臨鎮

皮日休吳中苦雨蛻蟪將入甌鰲蜺已臨鎮

穿壁

沈石田漁村鷗趁撐舟尾蟹行穿壁根

黃如蟹腹

黃帝內經五藏之氣黃如蟹腹者生

身似大蟹

董紅魚色黃頭尖身似大蟹口在頷下眼有兩竅通於腦尾長一尺三刺甚毒

忌橘

日用本草橘實同螃蟹食令人患軟癰洪造脆橙詩
謂橘不盈握勝橙頗進皮香壘難共搗遮莫蟹螯持

醉糟

洪适以糟蟹送曾守太湖九月霜波寒郭索不幸逢
漁蠻誰令骨醉糟丘裏使我涎流書卷間黃堂丈人
思幼玉耳邊不復親絲竹一杯聊使破愁顏要遣詩

情踵山谷

山谷詩相憶
尊前把蟹螯

擘蟹

方岳詩秋來何但食無魚老去寧須腹有書空洞略
容君幾輩草泥郭索一從渠

持蟹

徐渭詩正當菊醕堪持蟹無奈魚腸去割鷄

蟹災

某淮人也淮鄉之民情利害知之甚熟十餘年來若水若旱若鼠與蟹心爲災率無豐歲

陳唐卿論救荒書

蟹厄

大德丁未吳中蟹厄如蝗平田皆滿稻穀蕩盡吳諺蝦荒蟹亂正謂此也蟹之害稻自古爲然以五行占之乃爲兵象是亦披堅執銳介甲之屬明年海賊肖九六大肆剽掠殺人流血

平江記事

蟹鄉

或問蟹舍二字所出按說郛有蟹略四卷中蟹鄉一

則云蟹澤蟹洲蟹浪蟹穴蟹堞蟹窟蟹舍

北征張炎日紀

白雲詞蟹舍燈深沈石田冰邨圖魚庄蟹舍又魚羹
與蟹盤宋洪适詩霜風激水蟹舍寒長瀨黃昏張蟹
簪秀水朱昆田和緯蕭艸堂詩橋東橋西蟹火舍南
舍北漁磯豆葉黃聽蟲語蓑衣綠見人歸

北渚螯

李東陽詩露熟南州釀霜甘北渚螯

御製詩序

景龍三年九日中宗臨渭亭御製詩序陶潛盈把既
浮九醞之歡畢卓持螯須盡一生之興

文館記

爲晉公謝賜蟹狀

苑咸

右中使焦庭望奉宣恩旨賜臣生蟹一盤便令造食
臣自叨陪侍從累沐殊榮朝天賜浴於御湯退食每
霑於仙饌賞隨恩積慶逐特新臣之何功偏承厚錫
游泳渥澤但懼踰涯徘徊寵私無階答効無任望外
荷戴之極

右內官趙承暉至奉宣聖旨賜臣車螯蛤蜊等一盤
仍令便造趙承忠至又賜生蟹一盤高如瓊至又賜

白魚兩箇伏以衡門之下頻降王人簞食之中累承
天饌適口之異無時不霑駭目之珍每日幸遇顧循
涯分何以克當徘徊寵私罔知攸答

與孟少傅

孫覿

久苦瘡痍百藥盡試如抱薪湯沸非徒亡益也衰病
惡寒不敢附火老饕嗜蝦蟹不敢下筯對酒不敢濡
唇危坐塊然殆不知有身世病起出省書硯凝塵滿
席正如房次律遇故物於破甕中也

與秀守方學士

蟪蛄珍烹出於暑中未嘗至晉陵境內遠蒙分餉小

舟晨夜兼馳二十枚皆無恙拜貺荷顧存之厚東坡詩云一詩換得兩團尖公所餉十倍而無一語之酬又以爲作也

與朱宰守道

全上

某病餘食禁已放行而領蝤蛸糖蟹鮓臨之貺拜喜欣荷舟還輒以酒酢十斗將區區酒調停未盡善不敢多致氣候稍寒別遣

書法蟹方後

陳造

放鹿念號鳴易牛憐殼鯨仁心誰獨無天機或待觸悠悠寄宇宙往往徇口腹君子一飽適庖事不到目

寧知刀俎間宛轉無聲哭空蜚與土穴暴殄無遺育
况此佳風味世肯貸爾族炳炬擒爬沙免介薦膏馥
回來橫戈怒不救搖牙酷齧浴酒拍浮方法忍抄錄
躁擾至絕命耳悶痛在肉淡茹吾能事晚食媚山獻

次韻程安撫蟹二首

橫前兩峰踞草泥恃勇寧復防吳兒倏隨主父死五
鼎豈止郭最遭寢皮凡物有用皆賈禍汝禍已酷孰
使之平生一窟不自辦敢羨鯨鱣遊天池含飴茹酒
曹懷壁僅得士女稱珍奇不搖喉牙詫雋永遠封鬯
年爭矜持爬沙躁擾良可念請續杜老觀魚詩

物生不學螭蟠泥禍及乃諉造化見良材厚味庸自
保熊羆以掌豹以皮雄戟介甲亦壯矣乘流未可聽
所之託身要是鵬鷖宅不然借穴習家池主人仁心
及蟲蟻一肉三韭不好奇每譏騷客寒蒲縛更笑狂
士左手持忍饒愛物良未失可愧於奴形聲詩

次韻程師

程分惠糟蟹破戒
食之因詩來遂作

嗜慾割去土與泥調虞氣血等稚兒拘拘謏謏世所
怪未免鶴髮仍鷄皮甘脆爲目不爲腹蠶繭自縛良
苦之兩螯公子大於扇九室春色堪爲池
九室春房
州酒名
開緘况讀萬選句快意領此一段奇自憐忍欲忍艾

似涎流津饅不自持明知喘疾有時愈更寄斫雪加食詩

分糟蟹送沈守再次韻

全上

笑呼赤腳拆印泥婦姑歡喜舞兩見沅江似識九肋
驚伏雌祗慣五穀皮海螯不落江蟠下郭索公子是
似之但聞淮浙詫此味豈意分派來江池
今年二州大蟹不乏
門戶獨亨良多愧古以饕餮聯竊奇史君據案帶減
園一杯解顏情分持未用秉燭喚窈窕促軫且絃詩
老詩

景孫以婦病稽賞柑嘗蟹之約景盧以詩詰之

洪适

鄭莊好客底虛聲藥裏關心興未清應恐被圍因魯
酒也防完璧奔秦城謂德興二客雙螯弗講連宵會千橘
誰教滿路榮見說高堂新斷手何如自索玉杯行

破子

漁父飲時花作蔭羨魚煮蟹無他品世代太平除酒
禁漁父飲綠蓑藉地勝如錦

鄭憲席上再賦滿江紅

全上

累月愁霖知今席是何天色秋老矣芙蓉遮道黃花
留客長有霜螯來左右誰言櫪馬能煎迫眎高穹重

登起頑雲星難摘

桂枝香

朱彝尊

新霜晚渡見燃葦鴻天落潮魚步盡掩青筐縛急腥
涎齊吐津門水市無人問聽軋軋小車鳴路攜來九
陌不知還有酒徒閒否 又何況鄉園秋暮任空江

築舍斷沙名浦酥片金穰那管玉纖黏住橙陰菊外
登高宴捉鮓陽簪邊倚侶年年長擘燭斜晝舫水涼

朱戶

畢卓鮓
陽人

又

緯蕭截水見半漾湖波半撐湖背此際菱歌漸少滿

膳香穗漁師菰飯新炊後任欹斜楸頭船檣爬沙響
處連江露白一燈紅細便入跪雙螯都利被寒蒲
束縛仄行無計試放閒塘蓼畔描成秋意須愁解甲
隨潮去添瘦葦一枝扶起履霜聽徧聲聲宛似玉琴
絲裏

前題 沈暉日

菱塘風老正亂葦蕭蕭采香船少露白星疎草含烟
青燈小溪邊月黑初肥候濕筠籠一天霜曉寒蒲縛
就漁童未去酒人先到看秫釀新篴熟早向松火
山厨蜀薑親擣狼籍杯盤那計悲秋懷抱天津趙北

東西路也盈車軟塵吹道沉吟鄉味汾湖一曲不如
歸好

前題

陳惟崧

萋萋淺渚有郭索爬沙攪亂村杵溪斷霜紅織滿夕
陽鴉度漁人拂曉提筐喚小門邊陡驚羈旅羨材誰
算子魚通印河脰雪乳記昨歲秋牕鳴雨見小插
黃花濕蟬拖處笑說螯肥雙陸桂堂曾賭玉纖簾底
須親擘况西風釀寒如許沉吟此事何時還又暗聽
街鼓

海歸

朱彝尊

綠蒲包海蟳

閩小記蟳一名蟳蟳

味勝蟹胥滑

皮日休詩

一

笑過江人嘔心爲蟳蚶

霏雪錄蟳與石巨皆海錯之佳者

擁劍

陳子龍吳問文瑤觸網以空度擁劍護螯以奮趨顧
開雍武皇南巡賦亦有擁劍其利在腹

蚌螯

徐渭詩左盤持蚌螯右疊把饕餮

蟹螯

陳繼儒詩一官滋味同雞肋半世功名付蟹螯

醃蟹

事物紺珠飲食類有醢蟹

音鎗同鹽酒醬醋椒製

炙蟹酒煮蟹

蟹膾

剔肉同鱠酢作酒浴

糟丘郭索等名

沙蟹

譚元春詩沙蟹添杯事林禽習鉢聲

躁心

洪适謝景高兄惠魚蟹詩潯陽從事姿南金高山調
古誰知音寧同蝦隅作蟹語生憎郭索多躁心昔人
言釣蟹掄元今富貴家載幣輦金百方干進幸焉詭
遇無異蝦隅蟹語吾直謂螃蟹躁心耳而荆南雄曲
高音鮮和河西名驥滅沒誰賞可爲長歎息者也夫

士無六跪二螯決榮辱於漁童三五大好則大笑之
小好則小笑之曷足怪哉

仁術

程子指雞雛謂可以觀仁蓋仁者觸目皆仁偶見鷄
雛猝啓不忍之心卽孟子所謂仁術也余輯後錄載
食憲一卷張東亭問曰陶隱居著本草致傷物命子
母亦口腹故乖不忍耶

蟹黃

山谷詩蟹擘鵝子黃又蟹黃熊有白

雨雹蝦蟹

廣明庚子歲余在汝墳溫泉之別業夏四月朔旦雲
物暴起於西北隅瞬息間濃雲四塞大風壞屋拔木
雨且雹雹有如抔捲者鳥獸盡殪被於山澤中至午
方霽行潦之內蝦蟹甚衆明日余抵洛城自長夏門
之北夾道古槐十拔去五六門之鴟吻亦失矣余以
爲非吉徵也至八月汝州召募軍李迺光等一千五
百人自雁門回掠東郡南市焚長夏門而去入蜀自
茲諸夏騷蕩上天垂戒豈虛也哉

三水小牘

辟熱蜃蟹

南至火洲之南炎崑山之上其土人食蜃蟹鼉蛇以

辟熱

張說梁
四公記

鼈蟹

狄遵度鑿三江賦蛟鼉鼈蟹訝以相濡今何允蠹而
緣延又周光鎬黃河賦八足之蛭三足之能潛者逗
泥而汎沫出者緣厓而曝暉

老筐

佛典引韓詩外傳有孔子曰老筐爲雀老蒲爲葦二
語今本無之按老筐蟹也有時化雀

白蟹

嘉定州凌雲寺出白蟹亦出祝融峯泉中

李白把螯

李白詩搖扇對酒樓持袂把蟹螯

陳亞螃蟹

倦游雜錄陳少常亞以滑稽著知嶺南恩州到任作書與親友曰使君之五馬雙旌名目而已螃蟹之一文兩箇真實不虛

晴川後蟹錄卷之四